

दिनांक 09.05.2025

समय: 18.48 बजे

आकाशवाणी जयपुर-अजमेर
प्रादेशिक समाचार

- पाकिस्तान री ओर ऊं बीती रात करी ज्या मिसाइल अर ड्रोन हमला नाकाम-विदेश मंत्रालय प्रेस कॉन्फ्रेंस कर र ऑपरेशन सिन्दूर रा बारा मांय जाणकारी दीनीं
- भारत अर पाकिस्तान बीचे मौजूदा तणा-तणी रा हालात ने ध्यान राखता थकां राज्य मंत्री परिषद री मीटिंग-मुख्यमंत्री भजनलाल शर्मा सरहदी हलकां मांय तैयारियां रो जायजो लीनों
- प्रदेश रा सरहदी जिलां मांय हिफाजत रा केई एहतियाती उपाय- अंधारो करण रा हुकम री पूरी पालना रा निर्देशं
- राष्ट्रीय लोक अदालत काल लगायी जावेला-476 बैचां रे मार्फत करीब पांच लाख मामलां रा राजीनामा ऊं निपटारा री कोशिश करी जावेलां
- राजस्थान अर उत्तराखंड रा कृषि मंत्री जयपुर मांय मुलाकात कीनी- जैविक खेती आ मोटा अनाज री उपज समेत खेती-बाड़ी रा हलका मांय मदद रा बारा मांय चर्चा कीनीं

000

विदेश मंत्रालय भारत री फौज कानी ऊं चलाया जा रहया ऑपरेशन सिंदूर रा बारा मांय अब ऊं थोड़ी देर पैली खबरनवीसां ने जाणकारी दीनीं विदेश सचिव विक्रम मिसरी, मंत्रालय रा प्रवक्ता रणधीर जायसवाल, कर्नल सोफिया कुरैशी अर विंग कमांडर व्योमिका सिंह बीती रात पाकिस्तान री ओर ऊं करी ज्या हमलां अर भारत री जवाबी कार्यवाही रा बारा मांय जाणकारी दीनीं कर्नल सोफिया कुरैशी बतायो के पाकिस्तान री ओर ऊं करी ज्या सगळा मिसाइल अर ड्रोन हमला नाकाम कर दिया ज्यां

.....

ई मौके विदेश सचिव कह्यो के आतंकवाद रा केन्द्र रा तौर ऊं पाकिस्तान रो चेहरो पूरी दुनिया सामी आ गयो हैं वे कह्यो के पाकिस्तान भारत रा फौजी ठिकाणा ने निशाणो बणावण री कोशिश कीनी, ज्यां रो मुंहतोड़ जवाब दियो ज्यों

.....

000

मुख्यमंत्री भजनलाल शर्मा भारत-पाक बीचे तणा-तणी रा हालात ने ध्यान राखता थकां आज कैबिनेट री मीटिंग लीनीं ई दौरान राज्य रा सरहदी हलकां मांय करी जा रही तैयारियां रो जायजो लियो ज्यों मीटिंग पाछे उपमुख्यमंत्री डॉ. प्रेम चंद बैरवा अर संसदीय कार्य मंत्री जोगाराम पटेल खबरनवीसां सागे बातचीत कर र मीटिंग मांय करी ज्या विचार रा बारा मांय जाणकारी दीनीं सरहदी जिलां मांय ईलाज, स्वास्थ्य, ईंधन, खाण-पीण री सामग्री अर दूजी ज़रूरी चीजां रो स्टॉक

राख्यो जा रह्यो हैं मंत्री बतायो के एस.डी.आर.एफ. री टुकड़ियां ने ई सरहदी हलकां सारु रवाना करी ज्यी हैं

.....

000

पाकिस्तान ऊं लाग्योड़ी सरहद माथे चाल रही तणा-तणी ने ध्यान राखता थकां सरहद कने रा जिलां मांय हिफाजत सारु केई एहतियाती उपाय कर्या जा रह्या हैं म्हाणा खबरनवीस बतायो के बाड़मेर, जैसलमेर, बीकानेर, फलोदी, जोधपुर अर श्रीगंगानगर मांय आगला हुकम तांई रात ऊं आगली भोर तांई लाइटां नी जळायी जा सकेलां

.....

राज्य रा न्यारा-न्यारा हलकां ऊं सरहदी जिलां मांय दमकलां अर दूजी गाड़ियां भेजी जा रही हैं अनुभवी दमकल कर्मचारियां ने ई सरहदी हलकां मांय भेजा जा रह्या हैं पटवारी कर्मचारियां अर रोड़वेज कर्मचारियां री छुटियां रद्द कर दीरीजी हैं सरहदी जिलां मांय बाजार बेगा ई बंद करण अर लाइटां नी जळावण रा हुकम री पूरी पालना करण रा निर्देश दिया ज्यो हैं ई सागे ई सरहद ऊं लाग्योड़ा जिलां मांय ड्रोन उड़ावण अर पटाखा चलावण माथे आगला हुकम तांई रोक लगा दीरीजी हैं जैसलमेर जिला मांय जनता ने ड्रोन पुलिस थाणा मांय जमा करावण रा हुकम दिया ज्यो हैं सरहदी जिलां मांय रीता ओहदां माथे अहलकारां अर कर्मचारियां ने तैनात कर्या जा रह्या हैं चिकित्सा, नागरिक आपूर्ति, सार्वजनिक निर्माण, पेयजल अर आपदा प्रबंध विभाग आपातकालीन हालात री सूरत मांय जरूरी तैयारियां कर रह्या हैं जोधपुर रेंज रा पुलिस महानिरीक्षक विकास कुमार बतायो के लोगां ने खास सावचेती राखण अर युद्ध रा काम री ठोड़ां ऊं दूर रेहवण री राय दीरीजी हैं

.....

मौजूदा हालात ने ध्यान राखता थकां जयपुर जिला मुख्यालय परां नागरिक सुरक्षा अर आपदा राहत नियंत्रण कक्ष रो काम बेहतर तरीका ऊं चलावण सारु तीन टीमां बणायी ज्यी हैं जिला कलेक्टर डॉ. जितेन्द्र कुमार सोनी नियंत्रण कक्ष तीन पारियां मांय चलावण रा हुकम दीना हैं राजस्थान स्टेट गैस लिमिटेड प्रदेश मांय सी.एन.जी. टेशनां माथे हिफाजती मानकां री करड़ाई ऊं पालना करण रा हुकम दीना हैं सीएनजी टेशनां अर संवेदनशील ठोड़ां गैर-जरूरी लोगां रे दाखिल व्हेवण माथे रोक लगावण बाबत् कही ज्यो हैं ई सागे ई आर.एस.जी.एल. रा प्रबंध निदेशक रणवीर सिंह कर्मचारियां ने सोशल मीडिया रे जरिए गैर-जरूरी प्रतिक्रिया देवण ऊं बचण सारु कह्यो हैं

000

देश री सरहद री हिफाजत मांय लाग्योड़ा फौजियां रा मान मांय कांग्रेस पार्टी री ओर ऊं आज जयपुर मांय तिरंगा यात्रा निकाळी ज्यीं ई दौरान देशभक्ति रा गीतां सागे तिरंगो झण्डो लहराता थकां लोग शहर रा न्यारा-न्यारा गेलां ऊं पैदल मार्च निकाळ्यो ई मार्च रो मकसद जनता ने एकजुट रेहवण रो संदेश देवणो अर वीर फौजियां रो हौसलो बधावणो हों

000

केंद्र सरकार थल सेना अध्यक्ष ने जरूरत पड़्यां टेरिटोरियल आर्मी रा जवानां अर अहलकारां ने देश री हिफाजत अर जरूरी कामां सारु बुलावण रो खास हक दीनो हैं अ जवान अर अहलकार फौज री मदद सारु कदे ई बुलाया जा सकेलां रक्षा मंत्रालय ई बाबत् अधिसूचना जारी कर दीनी हैं ओ हुकम 9 फरवरी 2028 तांई लागू रेहवेलां

000

भारत रा सशस्त्र बल बीती रात पाकिस्तान कानी ऊं करी ज्यो ड्रोन अर मिसाइल हमलां ने नाकाम कर दीनां रक्षा मंत्रालय रे मुजब पाकिस्तान री ओर ऊं केई ठोड़ां अर फौजी ठिकाणां माथे नुकसान करण री कोशिश करीजी हीं ई बीचे सरकार सगळा मीडिया चैनलां, डिजिटल प्लेटफॉर्म अर जनता ऊं रक्षा अभियानां अर हिफाजती दस्तां री आवाजाही री लाइव कवरेज अर तुरत रिपोर्टिंग ऊं बचबा री राय दीनी हैं

000

पाकिस्तान कानी ऊं फर्जी अर भरमावण वाळी खबरां फैलावण सारु डिजिटल स्पेस काम लियो जा रह्यो है अर लोगां ने गुमराह करण सारु कहानियां बताई जा रही हैं ऐडा हालात मांय गर आप ने कोई ई शंका लायक सामग्री मिले, तो इण री जाणकारी पीआईबी फेक्ट चैक ने व्हाट्सएप नंबर 8

7 9 9 7 1 1 2 5 9 अर पत्र सूचना कार्यालय-पीआईबी रा ई-मेल पता माथे देवण री अपील हैं आप सगळा ऊं ताजा अर सही जाणकारियां सारू आकाशवाणी ऊं प्रसारित समाचार सुणबा री अपील हैं मौजूदा हालात ने ध्यान राखता थकां आकाशवाणी ऊं प्रसारित कर्या जावण वाळा समाचार बुलेटिनां री अवधि बधायी ज्यी हैं

000

.....

000

काल राष्ट्रीय विधिक सेवा प्राधिकरण री ओर ऊं राष्ट्रीय लोक अदालत लगायी जावेलां आ ई साल री दूजी लोक अदालत व्हेलां लोक अदालतां मांय राजीनामा ऊं झगडा-टन्टा सुलझावण री कोशिश करी जावेलां राज्य विधिक सेवा प्राधिकरण रा सदस्य सचिव हरिओम अत्री बतायो के लोक अदालतां सारू ज़िला स्तर माथे 476 बैचां बणायी ज्यी है अर करीब पांच लाख मामला निपटावणो तैय करी ज्यो हैं

.....

000

उत्तराखण्ड रा कृषि मंत्री गणेश जोशी आज कृषि मंत्री डॉ. किरोड़ी लाल मीणा सागे जयपुर मांय मुलाकात कीनीं ई दौरान एगो प्रोसेसिंग यूनिट, ऑर्गेनिक खेती, बीज उत्पादन, जी आई टैग, जैतून अर मोटा अनाज री उपज रा बारा मांय चर्चा करी ज्यीं मीटिंग मांय दोन्यू राज्यां मांय विविधिकरण अर कुदरती खेती ने बधावो देवण री संभावनावां रा बारा मांय विचार करी ज्यो

000